



ԵՐԵՎԱՆԻ ՔԱՂԱՔԱՊԵՏԱՐԱՆ

ՈՐՈՇՈՒՄ № ՎԿ-008

«ՎԱՐՉԱԿԱՆ ԻՐԱՎԱԽԱՏՄԱՆ ՎԵՐԱԲԵՐՅԱԼ ԳՈՐԾԻ
ՎԱՐՈՒՅԹԸ ՎԵՐՍԿՍԵԼՈՒ ԵՎ ԿԱՐՃԵԼՈՒ ՄԱՍԻՆ»

ք. Երևան

«21» Փետրվարի 2023թ.

1. Վարչական իրավախախտման վերաբերյալ գործի նկարագրությունը.

Երևանի քաղաքապետարանի աշխատակազմի քաղաքաշինության և հողի վերահսկողության վարչության աշխատակից Ն. Մկրտչյանի կողմից 24.12.2019 թվականին հայտնաբերվել է Հայաստանի Հանրապետության Վարչական իրավախախտումների վերաբերյալ օրենսգրքի 48-րդ հոդվածի 3-րդ մասով նախատեսված վարչական իրավախախտում, մասնավորապես՝ քաղաքացի Վլադիմիր Լևոնի Դարբինյանի նկատմամբ «Վարչական տույժ նշանակելու մասին» 21.08.2019 թվականի N Վ-32/2 որոշմամբ տուգանք նշանակվելուց հետո, Երևան քաղաքի Միրաքյան փողոցի հ. 22 հասցեում համայնքային սեփականություն հանդիսացող հողամասում ինքնակամ շինությունը /դարպասը/ ապամոնտաժված չէ և հողագավթման փաստը շարունակվում է: 12.12.2019 թվականի գրավոր ծանուցումով քաղաքացի Վլադիմիր Լևոնի Դարբինյանին առաջարկվել է 5-օրյա ժամկետում վերացնել իրավախախտման հետևանքները, սակայն 24.12.2019 թվականին կատարված տեղատեսությամբ պարզվել է, որ առաջարկվող ժամկետում Վլադիմիր Լևոնի Դարբինյանի կողմից որևէ քայլ չի ձեռնարկվել այդ ուղղությամբ, որի վերաբերյալ 25.12.2019 թվականին կազմվել է վարչական իրավախախտման վերաբերյալ թիվ 033293 արձանագրությունը (այսուհետ՝ արձանագրություն):

Որպես իրավախախտման փաստը հաստատող ապացույց, իրավախախտման հայտնաբերման պահին լուսանկարվել է իրավախախտման վայրը:

Հայտնաբերված իրավախախտման փաստով Երևանի քաղաքապետարանի նախաձեռնությամբ հարուցվել է վարչական վարույթ:

Վարչական իրավախախտման գործով հարուցված վարչական վարույթի շրջանակներում գործ փաստական հանգամանքների ուսումնասիրմանը, որպես վկա մասնակցել են քաղաքացի Ռոմիկ և Նվեր Շահրազյանները: Վերջիններս հայտնեցին, որ ներկա պահին դարպասն ապամոնտաժված չէ և առկա չէ հնարավորություն մետենալ իրեց սեփական տարածքին:

Հաշվի առնելով, որ «Վարչական տույժ նշանակելու մասին» 21.08.2019 թվականի հ. Վ-32/2 որոշումը վիճարկվում է դատական կարգով և ՀՀ վարչական դատարանի 15.01.2020 թվականի թիվ ՎԴ/10686/05/19 վարչական գործով կայացված որոշման համաձայն՝ Վլադիմիր Լևոնի Դարբինյանի հայցադիմումն ընդդեմ Երևանի քաղաքապետարանի՝ 21.08.2019 թվականի հ. Վ-32/2 որոշումն անվավեր ճանաչելու մասին, ընդունվել է վարույթ, ուստի «Վարչարարության հիմունքների և վարչական վարույթի մասին» ՀՀ օրենքի (հետայսու՝ Օրենք) 49-րդ հոդվածի 1-ին մասի ա) կետի հիմքով՝ 22.01.2020 թվականի հ. Վ-3/1 որոշմամբ, կասեցվել է 25.12.2019 թվականին քաղաքացի Վլադիմիր Լևոնի Դարբինյանի նկատմամբ կազմված հ. 033293 արձանագրության հիման վրա հարուցված վարչական վարույթը մինչև թիվ ՎԴ/10686/05/19 վարչական գործով՝ գործն ըստ էության լուծող դատական ակտի կայացումը և դրա օրինական ուժի մեջ մտնելը:

Դատարանի կողմից թիվ ՎԴ/10686/05/19 վարչական գործով կայացված որոշմամբ քաղաքացի Վլադիմիր Լևոնի Դարբինյանի հայցը բավարարվել է և արդյունքում անվավեր է ճանաչվել 21.08.2019 թվականի «Վարչական տույժ նշանակելու մասին» հ. Վ-32/2 որոշումը:

Նկատի ունենալով, որ 21.08.2019 թվականի «Վարչական տույժ նշանակելու մասին» հ. Վ-32/2 որոշումը դատական ակտով ճանաչվել է անվավեր և այն մտել է օրինական ուժի մեջ, հետևաբար վերացվել է 25.12.2019 թվականին կազմված հ. 033293 արձանագրության հիման վրա հարուցված վարչական վարույթի կասեցման հիմքը:

2. Գործի լուծման համար էական նշանակություն ունեցող ապացույցները.

Հարուցված վարչական վարույթի շրջանակներում գործի քննության ընթացքում՝ որպես մեկ համակցություն, հետազոտվեցին արձանագրությունը, վարչական իրավախախտման վերաբերյալ 21.08.2019 թվականի N Վ-32/2 գործը, Երևանի քաղաքապետարանի աշխատակազմի քաղաքաշինության և հողի վերահսկողության վարչության պետի 26.12.2019 թվականի հ. 19/27612, 12.12.2019 թվականի հ. 19/26496 գրությունները, Երևանի քաղաքապետարանի աշխատակազմի քաղաքաշինության և հողի վերահսկողության վարչության աշխատակցի 25.12.2019 թվականի «Արձանագրություն» վերստառությամբ գրությունը, ինչպես նաև քաղաքացիներ Ռոմիկ և Նվեր Շահբազյանների կողմից տրված բացատրությունը և լուսանկարները:

3. Գործի քննությունն իրականացնող իրավասու պաշտոնատար անձի ներքին համոզմունքներով ձևավորված պատճառաբանությունները և եզրահանգումը.

Հաշվի առնելով այն հանգամանքը, որ 25.12.2019 թվականի հ. 033293 արձանագրությունը կազմվել է 21.08.2019 թվականի «Վարչական տույժ նշանակելու մասին» հ. Վ-32/2 որոշմամբ վարչական տույժ նշանակելուց հետո իրավախախտումը շարունակելու համար, իսկ 21.08.2019 թվականի հ. Վ-32/2 որոշումը դատարանի օրինական ուժի մեջ մտած դատական ակտով անվավեր է ճանաչվել, հետևաբար վերանում է Օրենսգրքի 48-րդ հոդվածի 3-րդ մասով վարչական պատասխանատվության ենթարկելու հիմքը, կամ, այլ կերպ բացակայում է Օրենսգրքի 48-րդ հոդվածի 3-րդ մասի կիրառման պարտադիր նախապայմաններից մեկը՝ նույն հոդվածի 1-ին մասով տուգանված լինելու փաստը:

4. Վարչական ակտ ընդունելու իրավական հիմքերը.

Օրենսգրքի 9-րդ հոդվածի համաձայն՝ Վարչական իրավախախտում (զանցանք) է համարվում պետական կամ հասարակական կարգի, սոցիալիստական սեփականության, քաղաքացիների իրավունքների և ազատությունների, կառավարման սահմանված կարգի դեմ ունեցվող հակաիրավական, մեղավոր (ղիտավորյալ կամ անզգույշ) այնպիսի գործողությունը կամ անգործությունը, որի համար օրենսդրությամբ նախատեսված է վարչական պատասխանատվություն:

Սույն օրենսգրքով նախատեսված իրավախախտումների համար վարչական պատասխանատվություն առաջանում է, եթե այդ խախտումները իրենց բնույթով քրեական պատասխանատվություն չեն առաջացնում գործող օրենսդրությանը համապատասխան:

Օրենսգրքի 48-րդ հոդվածի 1-ին մասի համաձայն՝ պետական և (կամ) համայնքային սեփականություն հանդիսացող հողամասերն ինքնակամ զավթելը և դրա հետևանքները չվերացնելը՝ առաջացնում է տուգանքի նշանակում՝ սահմանված նվազագույն աշխատավարձի երկու հարյուրապատիկի չափով:

Օրենսգրքի 48-րդ հոդվածի 3-րդ մասի համաձայն՝ սույն հոդվածի առաջին և երկրորդ մասերով նախատեսված արարքներ կատարել շարունակելը սույն հոդվածի առաջին և երկրորդ մասերով նախատեսված կարգով տուգանք նշանակելուց հետո՝ առաջացնում է տուգանքի նշանակում՝ սահմանված նվազագույն աշխատավարձի երկու հազար հինգհարյուրապատիկի չափով:

Օրենսգրքի 247-րդ հոդվածի 1-ին կետի համաձայն՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման՝ վարչական իրավախախտման դեպքի կամ կազմի բացակայության դեպքում:

Օրենքի 49-րդ հոդվածի 1-ին մասի «ա» կետի համաձայն՝ վարչական մարմինը պարտավոր է կասեցնել վարչական վարույթը, եթե անհնարին է տվյալ վարույթի արդյունքում ակնկալվող վարչական ակտի ընդունումը մինչև սահմանադրական, վարչական, քաղաքացիական կամ քրեական դատավարության կարգով քննվող գործով որոշում (դատական ակտ) կայացնելը:

Օրենքի 49-րդ հոդվածի 3-րդ մասի 1-ին պարբերության համաձայն՝ սույն հոդվածի 1-ին մասի «ա» կետով նախատեսված դեպքերում վարչական վարույթը վերսկսվում է դրա կասեցումն առաջացրած հանգամանքները վերանալուց հետո:

Ելնելով վերոգրյալից և ղեկավարվելով Օրենսգրքի 48-րդ հոդվածի 1-ին, 3-րդ մասերով, 219.1-րդ, 247-րդ, 281-րդ և 282-րդ հոդվածներով, Օրենքի 49-րդ հոդվածի 1-ին մասի «ա» կետով, 3-րդ մասի 1-ին պարբերությամբ, ինչպես նաև Երևանի քաղաքապետի 30.05.2022 թվականի թիվ 1986-Ա որոշմամբ՝

ՈՐՈՇԵՑԻ

1. Քաղաքացի Վլադիմիր Լևոնի Դարբինյանի նկատմամբ 22.01.2020 թվականի վարչական իրավախախտման գործի վերաբերյալ հ. Վ-3/1 որոշմամբ կասեցված վարչական վարույթը վերսկսել:

2. Քաղաքացի Վլադիմիր Լևոնի Դարբինյանի նկատմամբ Օրենսգրքի 48-րդ հոդվածի 3-րդ մասով հարուցված վարչական իրավախախտման գործի վարույթը կարճել:

3. Սույն որոշումը կարող է բողոքարկվել վարչական կարգով՝ որոշումն ուժի մեջ մտնելուց հետո երեսուն օրվա ընթացքում, իսկ դատական կարգով՝ երկամսյա ժամկետում:

ԻՐԱՎԱԲԱՆԱԿԱՆ ՎԱՐՉՈՒԹՅԱՆ
ՊԵՏԻ ՏԵՂԱԿԱԼ՝



ԱՐԱՄ ՄԱՐՏԻՐՈՍՅԱՆ